



POLITICA D'UFFANTS E DA GIUVENILS  
EN IL CHANTUN GRISCHUN

# Actualitads da la politica d'uffants e da giuvenils

01 / 2023

Allegra, Ciao, Grüezi

Stimadas partenarias e stimads partenaris da la politica d'uffants e da giuvenils

In pass decisiv per promover la cumpatibilitad da la famiglia cun la professiun è fatg: il december 2022 è il Cussegl grond s'exprimì per ina basa moderna per finanziar la tgira d'uffants ordaifer la famiglia.

Plinavant impurtant: la Confederaziun ha prolungà la perioda per realisar las mesiras dal program da promoziun Politica d'uffants e da giuvenils.

Noss temas en survista

- LTGU – la nova lescha davart la tgira d'uffants complementara a la famiglia
- Recumandaziuns da qualidad per gruppas da gieu
- «PAT – Emprender cun geniturs» a partir dal 2023 en set vischnancas
- Promoziun tempriva: occurrenzas per vischnancas
- Il Grischun sustegna il Post da mediaziun per ils dretgs da l'uffant
- engage.ch – la plattafurma per l'engaschament da giuvenils
- Occurrenza: Uffanza tempriva – Qualidad tras colliaziun

Salids amicabels

Susanna Gadiant

manadra da l'Uffizi dal servetsch social dal Grischun

Beat Hatz

manader dal project Politica d'uffants e da giuvenils


Uffizi dal servetsch social dal Grischun

**«Cun la nova LTGU ha il chantun Grischun in model da finanziaziun modern. La cumpart da daners publics è cleramain pli auta. In agid efficazi per geniturs che lavuran e che han uffants pitschens è pia garanti.»**

Marcus Caduff, cusseglier guvernativ

LTGU – deliberà ina lescha moderna

Ils 6 da december 2022 ha il Cussegl grond acceptà la



revisiun totala da la Lescha davart la promoziun da la tgira d'uffants complementara a la famiglia en il chantun Grischun (LTGU).

Da la nova lescha profitan tant ils geniturs sco er las canortas d'uffants. La lescha prevesa subvenziuns pli autas e pia dapli sustegn per famiglias. Il nov model da finanziaziun meglierescha la planisabladad da las canortas d'uffants

Il Cussegl grond è per gronda part suandà la missiva tar la revisiun totala. Resumaziun da las novaziuns decisivas:

- Da nov dependa il sustegn da las entradas da las famiglias. Las contribuziuns da basa da fin ussa a piazzas en canortas d'uffants crodan davent. Uschia survegnan tut las famiglias las medemas reducziuns dal pretsch ch'èn dependentas da las entradas.
- Las famiglias survegnan reducziuns dal pretsch d'almain 25 fin 35 pertschient. Il Cussegl grond è pia s'exprimì per in sustegn da famiglias bainquant pli ferm che fin ussa. En cumparegliaziun cun l'entira Svizra paja il chantun Grischun uschia en il futur fitg grondas subvenziuns a la tgira d'uffants complementara a la famiglia.
- Il chantun e las vischnancas partan in cun l'auter ils custs a 50:50.
- Cun agid da contribuziuns e da cussegliaziun sustegna il chantun ils furniturs da prestaziuns cun purschidas renconuschidas, en las qualas vegnan tgirads uffants cun impediments.
- La nova lescha e pia er il nov model da subvenziun entran probablmain en vigur l'avust 2024.

## Qualitad en gruppas da gieu – recumandaziuns èn svilupadas



La qualitad è impurtanta – er en las gruppas da gieu. Quai che uffants pitschens passentan ed emprendan fin a l'entrada en scolina ed en scola, influenzescha lur carriera da scola e lur vita futura. Ils geniturs ston pia pudair sa fidar da la qualitad da las gruppas da gieu.

En il rom da la strategia per la promoziun tempriva en il Grischun ha l'Uffizi dal servetsch social – suenter avair consultà la federaziun da gruppas da gieu PSC Grischun – sviluppà recumandaziuns da qualitad per gruppas da gieu. Il punct da partenza da las recumandaziuns è stà in scleriment, sut tge cundiziuns che la purschida vegn definida sco gruppa da gieu e sa differenziescha da la purschida d'ina canorta d'uffants, la quala dovra ina permissiun.

> [Ulteriuras infurmaziuns](#)

## «PAT – Emprander cun geniturs» – a partir dal 2023 en set vischnancas

Per avair meglras cundiziuns da partenza per ils uffants da famiglias cun pliras grevezas e per lur geniturs s'engascha



«PAT – Emprender cun geniturs». Trenadras da geniturs scoladas sustegnan las famiglias cun uffants pitschens cun agid da visitas regularas a chasa che vegnan fatgas a partir da la naschienscha. La finamira è quella da meglierar las cundiziuns da viver e las schanzas da furnaziun dals uffants. Il focus vegn mess sin il rinforzament da las competenzas educativas e da las resursas da las famiglias pertutgadas.

Dapi passa 1 onn vegn purschì il program da las visitas preventivas a chasa «PAT – Emprender cun geniturs» en las vischnancas da pilot **Cuira** e **Tavau**. 13 famiglias cun tut en tut 27 uffants profitan gia da la purschida. Las experientschas ch'èn vegnidas fatgas èn fitg positivas.

Il cumenzament dal 2023 è vegnì lantschà il program «PAT – Emprender cun geniturs» er a **Favugn**, **Puntraschigna**, **Schlarigna**, **Segl** e **San Murezzan**. Il program vegn purschì da Pro Junior Grischun per incumbensa dal chantun e da las vischnancas da pilot.

- > «PAT – Emprender cun geniturs»
- > Comunicaziun

## Colliaziun regiunala 2023 pertutgant il tema promoziun tempriva



### Occurrenza d'input davart il tema promoziun tempriva

Il Post specialisà per la promoziun da la sanadad da l'Uffizi da sanadad dal Grischun preschenta la purschida en il sector da la promoziun tempriva, ed expertas ed experts intermediesschan las enconuschientschas specialisadas e lur experientschas en chausa. L'occurrenza ha lieu online.

**Termin:** mardi, ils 6 da zercladur 2023. Ulteriuras infurmaziuns suondan sin [bischfit.ch](https://www.bischfit.ch).

**Regiuns:** Partenz/Tavau ed Alvra

### Cussegliaziun individuala per vischnancas

Il Post specialisà per la promoziun da la sanadad permetta a las vischnancas u a las suprastanzas communalas da preschentar lur purschidas al lieu. > [Ulteriuras infurmaziuns](#)

## Post da mediaziun per ils dretgs da l'uffant – il Grischun s'associescha



Ina buna novitad per las specialistas ed ils specialists dal sistem giuridic e dal sistem da furnaziun: il chantun Grischun paja er quest onn ina contribuziun finanziaria al Post da mediaziun per ils dretgs da l'uffant e pussibilitescha uschia a las specialistas ed als specialists da far diever dals servetschs dal post da mediaziun.

### Cussegliaziun per uffants e giuvenils

Expertas ed experts gidan e cusseglian uffants e giuvenils a defender lur dretgs ed intermedieschian tranter els e las dretgiras, las autoritads sco er organisaziuns publicas u privatas. Uffants e giuvenils pon s'annunziar directamain tar il [Post da mediaziun per uffants](#).

### **Expertisa per specialistas e spezialists dal sistem giuridic**

La purschida da servetschs sa drizza a tut las spezialistas ed ils spezialists dal sistem giuridic, d'instituziuns da furmaziun, d'organs legislativs sco er a circuls politics ed a la vasta publicitad.

> [Post da mediaziun per ils dretgs da l'uffant](#)

---

## engage.ch – Mida la Svizra cun tia idea!



Has ti ina idea per il futur dal pajais u ta disturba insatge?

Es ti tranter 12 e 25 onns ed abitas en Svizra?

Alura inoltrescha tes giavischs e tias ideas en moda tut simpla fin ils 26 da mars sin engage.ch.

Quai va uschia > [video explicativ](#)

engage.ch sin > [Instagram](#)

Da tut las ideas ch'entran vegnan 15 giuvnas parlamentarias e giuvens parlamentariss ad eleger lur favorits, a discutir quels cun las auturas ed ils auturs ed als integrar en la politica naziunala. Participescha er ti e mida la Svizra!

### **Appel: Furni er Vus ina contribuziun a la participaziun!**

Cundividai engage.ch cun giuvenils/persunas giuvnas creschidas. Motivai ils giuvenils d'inoltrar lur ideas.

L'idea per engage.ch è naschida l'onn 2014. Dapi lura èsi capità bler: Ils giuvenils han inoltrà stgars 3500 giavischs. Bun 100 politicras e politichers èn sa fatschentads cun ils giavischs ed han realisà 120 projects e pretensiuns politicas.

---

## Uffanza tempriva – Qualitad tras colliaziun

La citad da Cuir organisescha ils 5 da zercladur 2023 in'occurrenza cun prof. dr. Martin Hafen davart il tema «Qualitad tras colliaziun». L'occurrenza vegn sustegnida dal Center chantunal per prevenziun e promoziun da la sanadad ed è pia averta per persunas spezialisadas interessadas da l'entir Grischun.

> [Ulteriuras infurmaziuns](#)

---

**Guardar novitads davart il project en l'internet sin l'agen computer**

Politica d'uffants e da giuvenils dal Grischun

01 / 2023 / 14.03.2023

Contact: Beat Hatz, Uffizi dal servetsch social dal Grischun, [kinderundjugendpolitik@soa.gr.ch](mailto:kinderundjugendpolitik@soa.gr.ch)

[visar la newsletter](#)

[Impressum](#)